

CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E A FEDERACIÓN PROVINCIAL DE MULLERES RURAIS DE OURENSE (FEMURO) PARA O DESENVOLVEMENTO DO PROXECTO *FÍOS VIOLETAS: PREVENCIÓN E SENSIBILIZACIÓN FRONTE Á VIOLENCIA DE XÉNERO*, NO MARCO DO PACTO DE ESTADO CONTRA A VIOLENCIA DE XÉNERO

MEMORIA EXPLICATIVA

De conformidade co Decreto 139/2024, do 20 de maio, polo que se establece a estrutura orgánica da Consellería de Política Social e Igualdade, á Dirección Xeral de Loita contra a Violencia de Xénero, como órgano de dirección correspóndelle Impulsar as actuacións conducentes á eliminación da violencia de xénero nos termos establecidos na Constitución, no Estatuto de autonomía de Galicia, na Lei 7/2023, do 30 de novembro, para a igualdade efectiva de mulleres e homes de Galicia, na Lei 11/2007, do 27 de xullo, galega para a prevención e o tratamento integral da violencia de xénero, e na demais lexislación aplicable na materia.

A Lei 11/2007, do 27 de xullo, galega para a prevención e o tratamento integral da violencia de xénero, modificada pola Lei 12/2016, do 22 de xullo, dispón a adopción en Galicia de medidas integrais para a sensibilización, a prevención e o tratamento da violencia de xénero, así como a protección e o apoio ás mulleres que a sofren, facendo especial fincapé (artigos 4 e 6), na especial dificultade das mulleres do ámbito rural para acceder aos recursos e aos servizos, establecendo a dita Lei, mandatos específicos para salvar a dobre discriminación das mulleres rurais, especialmente das que sofren situacións de violencia de xénero.

O 26 de febreiro de 2025 o pleno do Congreso dos Deputados aprobou de maneira case unánime a renovación e actualización do Pacto de Estado contra a Violencia de Xénero. O acordo amplía as mediadas que incluía no 2017 de 290 a 461 e introduce novos eixes como son a violencia vicaria, a económica e a dixital. Ademais prestáselle especial atención ás mulleres rurais e ás mulleres con discapacidade. Así a medida 41 recolle o reforzar as campañas de sensibilización cara as mulleres no ámbito rural, pola maior incidencia nese entorno.



O capítulo 3. Asistencia, axuda e protección ás vítimas denomina o seu eixe 3.4 como *Rural* e nel as medidas 246 a 254 ofrecen unha serie de actuacións destinadas ás mulleres do rural tales como garantir o enfoque interseccional en calquera política, medida e resposta institucional que se adopte para combater a violencia contra as mulleres de forma que se garanta o seu pleno acceso e exercicio efectivo de dereitos, impulsar o asociacionismo de mulleres no ámbito rural para axudar ás vítimas garantindo formación e recursos para ditas entidades e brindarlle ás vítimas unha atención e acompañamento efectivas e de calidade adaptadas ás condicións e especificidades do entorno rural.

A Federación Provincial de Mulleres Rurais de Ourense, FEMURO, é unha entidade sen ánimo de lucro, inscrita no Rexistro de Entidades Prestadoras de Servizos Sociais co número E1074 , ten entre os seus fins o de integrar ás diferentes asociacións de mulleres rurais que se atopan diseminadas en núcleos rurais da provincia de Ourense, de cara a aunar esforzos e recursos e garantindo un maior achegamento a eles por parte de todas as mulleres. Conta con 65 asociacións de mulleres rurais federadas e integra unhas 5.000 mulleres do medio rural na provincia de Ourense, sendo a única Federación destas características en toda a provincia. Desenvolve actividades de información, formación, atención, apoio e acompañamento á mulleres do ámbito rural, entre elas a mulleres vítimas da violencia de xénero, promovendo ademais accións de información e formación nas que sempre e de xeito transversal se atopa presente o enfoque de xénero.

No ano 2026 a entidade promoverá accións como a prevención da violencia de xénero en todas as súas manifestacións, fomentará a igualdade real entre mulleres e homes, así como impulsará a educación afectivo-sexual integral como ferramenta clave para a prevención das violencias sexuais, das relacións abusivas e das desigualdades de xénero.

A Consellería de Política Social e Igualdade estima oportuno asinar un convenio de colaboración coa Federación Provincial de Mulleres Rurais de Ourense, FEMURO para o financiamento das accións sinaladas, cuxo obxectivo prioritario é reforzar o apoio social ás mulleres do rural, en especial ás vítimas de violencia de xénero, con accións de difícil encaixe nos servizos públicos, a través das cales preténdese acadar unhas maiores habilidades sociais, autoestima e empoderamento para as mulleres e tendo presente e considerando en todo momento os matices que a violencia de xénero adquire no rural.



Así mesmo e tendo en conta que Galicia é unha comunidade autónoma rural, a Consellería de Política Social e Igualdade pretende asinar convenios de colaboración coas federacións e asociacións de mulleres das provincias de A Coruña, Lugo e Pontevedra, sendo todas elas entidades que traballan no eido da violencia de xénero que tanto pola súa capacidade como pola súa representatividade son as únicas en Galicia que poden levar a cabo accións de prevención, formación, información e sensibilización en materia de violencia de xénero no ámbito rural.

Santiago de Compostela, na data da sinatura electrónica
O director xeral de Loita contra a Violencia de Xénero

Roberto Barba Alvedro

